

– Isi, isi! Ka pomozhinav tut. Valla-billya dori kol vsichko te pomozhinav tut. Kana ka dikhes zori, ka mares trin drom ko pulo, dori ande phuv. Me resav, me siom pashal tute.

Vazdel o raklo o kapaki, mukel i pepelyanka pashal peste. Lel gadava shishava, prwskiel trin kapkes o raklo pal o dumo. Sasto si, nay sasto. lel gadava shishava, thool ande poski, chhiel pes upral ko grast, dzhal gadava drom, deto o droma bareste achhile. Trin drom prwskisardas, sar sas pala achhile. Lyas o dyasno drom, kate pale bulyasa phirena e manusha. Dikhle les e manusha.

– Ey, kerata, tu prekosindan o drom, tu dori sam te zahalo nikerdan amen papale bulyasa te phiras. Amare gradines dori shukile.

– Me avilyom te lyakovinav tumen.

Prwskiel trin drom, dzhun-dzhun sey. Sar sineas, pale achhilo peske. Togava veche chektin, o raklo te dzhal peske.

Bisminlyahi, reslo o dzhukles. Phanlyas leskoro drom dori ov.

– Ey, lyan duy lyan, lyan o shishava? Nashti dori te hakhes kate. Ame dori ka maras amen tusa do posledno.

– Ka maras, ka maras amen.

Shtrap o raklo, inkaldas o kalwchi. Saranda dies thay saranda ratya marde pes. O raklo chhinel o shero, leski duy baryona. Nashti nadvindyas o raklo. Ov diyas pes gogi i pepelyankake.

– Anaswnw siktimini! Oy mange phenlyas i pepelyanka te dikhava zori, te marav trin drom o pulo ande phuv. Oy ka avel.

Shtrap, shtrap, shtrap i i pepelyanka pash leste.

– Phrala, phen so manges?

– Chhe, phene, saranda dies marasa amen. Chhinava e shere leskere, me chhinav, a on baryona.

– Aki me phraleske gogi. Hale tuke kaya stadi. Thov la ko shero thay hakh.

Thovel la ko shero, korerdas la, nakhlo uthe. Var mo, chok mo, reslo ki mechka.

– Ey, phrala, nashti te nakhes kate. Ako nadviesama ka nakhes, ako nashti, nash tal i phuv.

– Ma ker, soske te mudarav tut? Muk man te nakhav mange, me ni mangav te mudarav tut.

– Ne, ka maras amen!

Bisminlyahi, o raklo ekh domukh ko kan. Dzhal peske nachi. Chektin o raklo golo.

Var mo, chok mo – resela o phures.